

**DE STATV
ECCLESIAE ET
RELIGIONIS IN
REGNO PERSICO**

Matthaeus Dresser



THE
THE
THE

THE
THE
THE

GENEROSA IN-
DOLE, NOBILITATEq̃
vera conspicuis juvenibus, ac Do-
minis, **MARCO & CASPARI,**
fratribus, **IAROSLAO**q̃ patrue-
li Oleſnitſkijſ de Oleſnitſki, Pola-
nis, Lipsia, in ſtudijs doctrinae lite-
rarum verſantibus, dominis
& amicis.

S. D.

MATTHAEVS DRESSERVS.



Lim in Græcia conven-
tus erant Olympici, qui
quinto quoq̃ anno ce-
lebrabantur, ad quos
ex omni Græcia con-
fluebat ingens multitudo juvenum
& ſenum, & quam quiſq̃ artem didi-
cerat, eam ibi tanquam in frequentif-
ſimo orbis terræ theatro oſtentabat.

A ij

Venit

DEDICATORIA.

Venit eodem cum patre suo Oloro Thucydides puer, & audiuit Herodotum historiam suam Græciæ populis recitantem. Inter auscultandum verò tanta cupiditate ardoreque mentis ad gloriam incensus est, ut lacrymæ ex oculis eruperint. Quod ubi cognovit Herodotus, adiit eum, & perspecta illius mirifica indole, hortari cepit, ut rectis studiis ad laudem sapientiæ contenderet. Tum patrem etiam ipsum Olorum monuit, ne ingenij tanti vim negligeret, sed liberaliter instituendum doctrina tantum filium curaret. Quod etiam factum est, & inde Thucydides in virum sapientem, eruditum, & gloria prædicationeque sempiterna dignum evasit.

Conspexi & ego, MARCE, CASPAR, & IAROSLAE Olesnitzkij de Olesnitzki, vestrum in me audiendo ardo.

DEDICATORIA.

do ardorem, curam, attentionem, & assiduitatem, dum historias & latinæ eloquentiæ autores enarraui. Quo quidem spectaculo sic inflammatus fui, vt mihi spem fructus magni & vberis de vobis pollicitus sim. Fieri enim non potest, quin studia in adolescentia, tanquam in herbis, significent, quantæ fruges industriæ sint futuræ. Paria hæc erant vobiscum, MARCE & CASPAR, SEBASTIANO fratri, dum vita ei suppetebat, Quippe qui contentione laudabili cum æqualibus, alacritate, & vigilantia certabat, non paucos etiam ipsædem rebus superabat. Cui, postquam munus pensumq; sibi assignatum in ardente literarum studio cum pietatis ac veri cultus diuini cura perpetua coniuncto, in his terris absoluerat, DEVS quietem beatam in cœlis, hoc anno currente, mense Augusto, tribuit.

A iij

Vobis

DEDICATORIA.

Vobis ergo in hoc tam præclaro doctrinæ honestæ & fructuosæ cursu versantibus, hoc meum de studijs vestris iudicium, quasi quoddam testimonium industriæ, per hanc compellationem, impertire placuit: quo non tam vos, ut in via sapientiæ & virtutis, quam ingressi estis, progrediamini, incitarem, quàm parentibus vestris, viris generosis & eximia laude pietatis atq; iudicij, gravitatis ac sapientiæ præstantibus planum facerem, optimè poni sumtus, quos in doctrina & educatione vestra liberali collocant. Ita enim futurum esse omnino mihi persuadeo, ut non ita multò post literarum scientia, & eloquendi elegantia instructi domum redeatis, ac parentes læticia afficiatis, vobis verò ac patriæ honori ac emolumento sitis. Quam quidem ad rem

adiumen-

DEDICATORIA.

adiumentum magnum affert. IOAN-
NES GROTHERVVS Rostochiensis,
in cuius disciplinam à parentibus tra-
diti estis. Nam & ad pietatis sincere
ræq; religionis cultum vos traducit,
& omni doctrina honesta erudit.
Tum, quod plurimum in hoc genere
valet, exemplo suo ad summæ laudis
studium inflammat, & ipse castissi-
mus, ac omnis officiij diligentissimus
vobis documenta pudoris, industriæ
& prudentiæ præclara præbet. Hoc
igitur præceptore, nihil dubito, quin
ad ea, quæ paratis, meditamini, ac co-
gitatis, multum profecturi sitis. Quod
quidem desiderium vestrum pium &
ardens vt expleat is, qui omnis sa-
pientiæ & felicitatis nostræ autor &
dator est, ex animo precor. Ego
profectò aliud nihil in hac compella-
tione mea specto & quæro, quàm vt

A iij

voce


DEDICATORIA.

voce & affectione animi in vos singulari vobis gratuler, & propositum inceptumq; studiorum vestrorum cursum mihi probari vehementer, ostendam. Valete, Lipsiæ, Calend. Februarij, Anno salutis per Christum reparatæ 1589.



DE

DE STATV EC-
CLESIAE, ET RELIGIO-
nis in regno Persico.

 *Um Apostolus ex Psalmo
ait, In omnem terram exi-
vit sonus eorum, & in fines orbis
terrarum verba eorum: velut su-
periori è loco concionans nos o-
mnes admonet, ut totam animis
tanquam oculis lustremus terram,
& ubi, qualisq; sit Ecclesia, exqui-
ramus. Cùm enim Catholica ea
sit, ut totum terrarum orbem com-
plectatur, in omne sq; illius partes
atq; angulos diffundatur necesse
est. Quod cùm de Ecclesia nos
credere ipsum DEI verbum san-
ctum, & fides nostra Christiana
A 5 jubeat*

jubeat: etiam sedes eius, ac religionis statum, qui ubiq³ locorum est, explorare convenit. Id enim & fidei veritatem confirmat, & solatij multum affert: quando videlicet lucem verbi divini longè lateq³ ad fines usq³ terrarum dissepgi intelligimus, per eamq³ ad societatem regni atq³ beatitudinis eterna omnes mortales, fratres & sorores, quocūq³ in loco sunt, vocari perspicimus. Tum etiam hoc cōmodi inde percipimus, ut cognita divina lucis usura, qua nobis præter ceteros, DEI munere conceditur atq³ tribuitur, causam nos etiam habere iustam gratias DEO agendi pro tanto beneficio statuamus,

IN REGN: PERSICO.

mus: fratrum verò sororumq; nostrarum per vastas mundi regiones dispersarum fortunam misereamur, maiorēq; diuinae lucis facultatē illis precemur. Ut ergo superiori oratione de religione in Aethiopia, statum Ecclesiae, quae est ad Austrum, exposui: sic hac narratione de religione in Persia, eiusdem conditionem, quae est versus Orientem, explicare conabor. Unde, qui DEI cultus in bona magnaq; Orientalium regionum parte vigeant aut usurpentur, quod ad eius fieri potest, constare possit.

Ante omnia verò de situ & magnitudine Persiae hoc tenendum est, regnum Persicum, quod Sophorum

DE STATV ECCLE:

phorum nunc vocant, complecti
 maximas Orientis regiones, As-
 syriam, siue Babyloniam, Me-
 diam, Persiam, Hircaniam, Par-
 thiam & Caramaniam. Qua-
 rum unaquaq, tam latè patet, ut
 regnum florens & amplum jure
 omni habeatur. Assyria in pri-
 mis nobilitata est propter monar-
 chiam primam, quæ autore Nim-
 rodo illic cæpit, anno mundi 1788.
 & annis 1360 durauit. Eius caput
 sedesq, regia Babylon annis am-
 plius mille sexcentis, fuit. Esi
 autem Persarum Rex in hodie-
 rum vsq, diem Babylonicum re-
 gnum sibi vendicat, & Calypham
 Magnum, hoc est, dominum su-
 premum

IN REGN: PERSICO.

*premiū Assyriorum sese appellat:
 Turca tamen loca illa partim va-
 sta, partim florentia longè lateq;
 tenet, ubi Babylonici regni sedes
 olim fuit. Quin ipsius etiam Ba-
 bylonis rudera, quæ conspiciuntur,
 possidet, & urbi amplæ Bagaded,
 quæ & Baldach dicitur, domina-
 tur. Est autem Bagaded ad Ty-
 grim sita, itinere unius diei & di-
 midij à Babylone distans, quæ Se-
 leucia quondam & Ctesiphon vo-
 citata est, ex ruderibus Babylonis
 edificata. Paret & ipsa Impera-
 tori Turcico cum tota regione illa
 usq; ad Balsaram civitatem in ex-
 tremis finibus Turcicis, ubi Tygrus
 Euphrati miscetur. Est sub eius-
 dem*

DE STATV ECCLIE:

dem etiam imperio Ninive, quæ
 euersa & vastata à Babylonicis
 Regibus paulò ante primum urbis
 Hierosolymæ excidium, in ruinis
 tota jacet. Sed eius loco hodie urbs
 est, quæ Mossel appellatur, cum
 alijs oppidulis ad Tygrim in fini-
 bus maioris Armeniæ extructa.
 Mediæ quoq; celebre nomen est in
 historijs propter Darium Me-
 dum, qui cum Cyro Monarchiam
 à Chaldeis ad Medos & Persas
 transtulit. Huius ciuitas præci-
 pua nominatur Ecbatana, hodie
 Tauris, quondam Mediæ regum,
 nunc Sophorum & Persarum se-
 des. Persia & Persis latè etiam
 patet, cuius caput hodie est Siras
 sine

IN REGN: PERSICO.

siue Sitta, Sophorum hybernū
domicilium, quemadmodum Taur-
ris æstiuum. Hyrcania opibus ma-
ximè affluit. Parthia metropo-
lis Charras & Hecatompyle ap-
pellatur à centum portis. Cara-
mania partim deserta est, partim
moribus Persicis uiuit. Incipiunt
hæ omnes regiones à fine climatis
tertij, & tendunt usq; ad finem se-
ptimi. Reliqua non est huius in-
stituti persequi. Hæc verò attingenda fuerunt, ut qua in mundi
parte situm sit regnum Persicum,
& quàm latè pateat, aliquo modo
cognoscatur. Nunc statum Ec-
clesiæ explicaturus diuidam omne
Persarum regnum in tempora
octo

octo. Primum complectitur spacium à condito mundo usq; ad monarchiam. Secundum, monarchiam ipsam, cum sequentibus annis usq; ad natum Christum. Tertium, a nato Christo usq; ad Saracenos. Quartum, servitutem sub Saracenis. Quintum, sub Tartaris. Sextum recuperatam libertatem per Gensam Parthorum regem. Septimum, Magni Vsan-
cassanis, qui unus ex Persia satrapis regno potitus est. Postremum, ab Ismaele Sopho ad hanc usq; aetatem. His regni mutationibus singulis singula etiam ferè religionis mutationes facta sunt.

Primam Ecclesia sedem DEVS collocavit

collocavit in Oriente, nec post eiectionem parentum ex Paradiso alibi fuit Ecclesia Adami, quam in Orientis ea parte, in qua Damascus postea est condita. Id quod inde conijcere licet, quòd Abelus nomen agro & urbi Damasco à suo sanguine indidit. Cainus verò occiso fratre, in urbe Hanoch à se condita, ubi post diluvium Babylon edificata est, habitavit. Quid? quod post diluvium etiam ijsdem in regionibus Orientis Ecclesia edificata est. Noamus enim in Armenia, Semus Hierosolymis verbum DEI propagavit. Elam verò Semi filius in Persia, qua ab eo etiam nomen adepta est,

B auitam

auitā religionem coluit: quem-
admodum Assur eiusdem Semi fi-
lius Assyria nomen suum & cul-
tum DEI importauit. Ex quo
sanè de statu Ecclesiæ, qui tunc
fuit, iudicare non est difficile. A-
damus enim veram & ex ore Dei
ipsius acceptam atq; haustam reli-
gionem professus est. Eandem so-
nuerunt etiam & propagarunt
Semus, Elam, Assur, & alij.

Simulac verò impius Cainus, &
post diluuiū Nimrodus amænissi-
mas Orientis regiones occuparūt,
nouos etiā Dei cultus inuexerunt,
& Ecclesiam sanctā in hypocriti-
cam & idolatricā conuerterunt.
Inde cultus ignis in Chaldaea, hor-
ribili

ribili furore exarsit, nec deleri postea in illa gente potuit. Quod enim DEVS igne de cælo cadente cultum sanctorum patrum in sacrificijs comprobavit, id Satanas operum DEI emulus ad stabilendam idolatriam detorsit, & ex igne DEVM effinxit, effecitq; adeo ut flamma tanquam DEVS adoraretur. Nota est enim pompa Persica, in qua regem præcessit equus gerens parvam aram, ex cuius cineribus flammula sacri ignis effulsit, quæ Orimasda fuit appellata. Regem verò procures regni & turba ingens populi secuta est. Hæc res Abrahamum etiam impulit, ut relicta patria, ex Vr

*Chaldeorum ad Semum vera Ec-
 clesia antistitem, & incorrupta re-
 ligionis custodem migraret. Hac
 igitur fuit & mansit religio Chal-
 daeorum & Persarū usq; ad tem-
 pus exilij Iudaorum, quo Daniel
 & alij pij semina vera religionis
 passim in Assyria & Persia spar-
 serunt. Non enim dubium est, per
 id tempus in utraq; monarchia,
 Assyria & Persia, vera de DEO
 doctrina fundamenta esse iacta:
 quando scilicet non Daniel solum,
 sed ceteri etiam Iudaei verum
 DEVM confessi sunt, & miracu-
 lis illustribus eorum doctrina &
 cultus fuit confirmatus. Ac in
 Assyria quidem Nabochdonosor
 & fi-*

Et filius eius Euilmerodach, in
 Media verò Darius Medus, in
 Persia deniq; Cyrus ad agnitionem
 veri DEI conuersi sunt. Neq; id
 solùm, sed edicta quoq; pietatis ple-
 na à Nabochdonosore Et Dario de
 colendo Danielis DEO per uniuersum
 regnum proposita sunt. Ex
 quo sanè intelligitur, religionis ve-
 ra cultum in monarchia Persica
 viguisse, Et diu retentum esse. Etsi
 enim in regno Assyrio Balthasar
 nepos Nabochdonosoris oblitus
 auita castigationis, idolorum cul-
 tum restituit, Et palàm vero DEO
 populi Israëlitici maledixit: citò
 tamen repressa est eius impietas,
 Et regnum ab eo ad Darium Et

Cyrum translātū, per quos verus
etiam DEI cultus vindicatus est.
manserūt huius religionis reliquiæ
quadam in gente Persica ad illud
usq; tempus, quo filius DEI homo
factus, & rex Iudaorū natus est.
Id enim indicat Magorum aduen-
tus ex Persia in urbem Hierosoly-
mam ad adorandum Messiam,
quem Iudaorum regem vocabant:
cū tamen sat scirent, seruitute
misera tunc oppressam esse Iudaā.
Consentaneum est igitur, eos ali-
quam habuisse de Messia venturo
noticiam, quæ absq; dubio ex Da-
nielis Ecclesia atq; doctrina in
Persico regno propagata fuit re-
liqua. Rex quidem, Persarum
more

more institutoq^{ue}, tanquam DEI simulacrum adorabatur, ut Plutarchus scribit in vita Themistoclis: qui & ipse regem adorare coactus fuit. Quanquam enim excusare se studebat, Gracū sese esse inquiens: tamen cū magnis de rebus communicare cum rege vellet, respondit ei Artabanus: Nobis cū multa atq^{ue} pulcerrima sint leges, illa omnium honestissima est, observare regem, simulacrumq^{ue} DEI omnia servantis adorare. Parere igitur si nostris legibus volueris, regemq^{ue} adoraveris, fas tibi erit intueri regem, atq^{ue} alloqui. Sin autem tibi alia mens est, internuncijs tibi ad regem utendum

B iiij erit,

erit. Non enim patrium est regi, hominem minus adorantem audire. Hæc ubi audiuit Themistocles, legibus Persicis se obtemperaturum promisit, & regem adoravit. Verum externus hic tantum fuit cultus gestu declaratus: alia longè fuit adoratio infantis IESV, regis Iudaorum. Minimè enim ut regem politicum adorarent illum Magi, quod neq; iustum fuit, neq; lex Persica permisit, ut externum regem adorarent. Itaq; de interno cultu hæc Messie adoratio à Magis facta intelligi debet, qua diuinum honorem & omnipotentiam illi tribuerunt, tum gratiam etiam, iustitiam, & vitam ab eo petue-

petruerunt. Hæc quia non aliunde nisi ex sancto DEI verbo cognosci possunt, apertum est, verbi diuini reliquias ex Danielis Ecclesia ad illud vsq; tempus nati Messia in Persia extitisse.

Magi porrò Susæ, quæ metropolis Persia fuit, Academiam celebrem habuerunt, quæ liberalibus studijs & doctrinis optimis affluxit. In ea principes eruditi sunt, literisq; sapientia, iusticia, & fortitudine instructi: ut inde Reges, Satrapæ, & principes ad omne munus publicum prodirent. Mansit etiam absq; ulla dubitatione in ea Messia venturi noticia ex Danielis vaticinio: Unde & tempus

B v nati-

natiuitatis eius aestimari potuit. Quod quidem cum iam instare, vel potius completum esse certò statuerent Magi: diuinitus excitata illustri in aere stella, iter ducentorum triginta milliarium ingressi sunt, ut debitum honorem cultumq; Messia nato tribuerent. Ut autem Susa eos venisse Hierosolymam credamus, Euangelistæ testimonium nos mouere debet, qui disertè affirmat, ex Oriente illos accessisse, ubi sita est Susa, non à meridie, in quo collocata fuit Saba. Confecto iam itinere tam longo, spe & fiducia plena Hierosolymam ingressi, non querendum sibi existimarunt, an, & quo tempore natus

natus esset Messias. Id enim probè cognitum exploratumq; ex Prophetia habebant: sed ubi esset natus. Duxerat autem eos stella Hierosolymam ad sedem Ecclesiæ primariã duabus de causis. Primum, quòd Sion esset mons electus à DEO, ut esset sedes regni & sacrarij, quemadmodum Psal. ait 132. Quoniã Sion elegit Dominus, ibi cupit habitare. Unde quoq; initium predicationis Evangelij per CHRISTVM ipsum & Apostolos factum est. Secundo, ut Magorum aduentu & testimonio omnes Hierosolymitani, excusso veterno, ad querendum & amplectendum Messiam natum incenderentur.

Ac

Ac mirum est, cum locus natiuitatis Messiae ex Prophetia apertius cognitusq; fuerit, non ipsum etiam Messiam à cæcis & obstinatis Iudæis esse exceptum. Quod & Magi ipsi absq; dubio mirati sunt, nihil moueri Iudæos aduentu Messiae tam longa seculorum & ætatum serie expectati, cum procul in Persia eius natiuitas in summa expectatione fuisset. Hinc igitur profecti cum ad locum venissent, Deus bone, quanta leticia diuturni desiderij situm expleuerunt? Tunc enim re euentuq; comprobatum tandem cognouerunt id, quod certò Prophetæ predixerant, & pij omnes crediderant. Prostrati igitur

IN REGNO PERSICO.

tur corpore & animo, suam in
Messiam pietatem fidemq; testati
sunt, & letis animis DEO gratias
pro tanto dono Messiae exhibiti ege-
runt: tum muneribus etiam tanto
rege & victore peccati, mortis, Sa-
tanae, & inferni dignis affecerunt.
Accessit diuinum oraculum, quo
admoniti sunt de via, per quam
redire in Persiam deberent. Hoc
igitur peracto opere, ad suos reuer-
si beneficium nati Messiae absq; du-
bio omni predicarunt, lateq; fa-
mam de exhibito Christo dissipa-
runt, nec in Academia solum, cu-
ius Professores erant, Messiam
docuerunt, sed Euangelij etiam do-
ctrinam longè lateq; diuulgarunt.

Sic

Sic ergo Christiana religio statim Christi in carnem aduentus Persis innotuit. Non enim latere veluit Christus sua beneficia, nec ad paucos ea restringi passus est, sed in omnes mundi partes diffundi, cunctasq; creaturas participes fieri aeternae consuetudinis optauit. Hinc adeo factum esse credo, ut in prima pentecoste Christiana, discipulis miraculose varijs linguis loquentibus, etiam Parthi, Medi, & Elamita. hoc est, Persae, auditores fuerint. Postea verò secundum Christi mandatum cœptum est Euangelium non solum ab ipsis Apostolis, sed ab eorum etiam discipulis in omnibus partibus

bus mundi disseminari. Nam Thomas in Parthia, Media, Persia: Bartholomeus verò in Armenia & India praconium fecit, ut scribit Eusebius. Et si igitur ignis cultores vocantur Persae in historijs: tamen magna eorum pars Christum etiam cognovit & coluit: ut vera ex omni parte sit Ecclesiae definitio, quòd sit cœtus credentium per totum terrarum orbem dispersus.

Nec dubium mihi est, mansisse aliquam veri Dei & filij eius Iesu Christi noticiã, & cultum in Persia usq; ad Saracenorum dominatum, qui unã cum servitute etiam religionis

religionis obscuracionem & errores inuexerunt. Armenios certè Christianos, & quidem pietatis studiosos vocat Eusebius lib. 9. cap. 7. Quin Episcopum etiam Ecclesie per Armeniam disertè nominat Merutanem lib. 9. cap. 46. Quo tempore Imperator Diocletianus grauissimè passim affluxit Christianos, circa annum a nato Christo 284. Deinde eiusdem Ecclesie Episcopum Eustathium Socrates lib. 2. cap. 43. Theophilum verò idem lib. 3. cap. 24. appellat. In Persia verò Ecclesiam numerosam fuisse Constantini Magni tempore post annum Christi 300, Eusebius in
vita

vita Constantini scribit. Sozomenus autem Persas ab initio Christum professos esse, & Diabonorum regionem omnem Christum coluisse, lib. 2. capit. 12. confirmat. Constantinus equidem victis ac debellatis omnibus suis hostibus, qui Christi nomen oderant, & in unum delere constituerant, enixè operam dedit, ut Christiana religionis professionem cunctis gentibus commendaret. Cum igitur id temporis Persæ quoque, cum ex vicinorum Armenorum & Osroenorum familiaritate, tum ex diuina gratia radios longè lateq; de lumine suo jaciente, in Christi cognitione cultuq; indies confirmarentur

C

atq;

alq^{ue} auferentur: exarsit immane
 odium Magorum & Iudaorum
 in illos, qui etiam Sapor i ea tem-
 pestate in Persia regnanti auctores
 fuerunt, ut eos vinculis, verberibus,
 & omni supplicio excruciatos
 necaret. Hec ergo crudelitas pium
 Constantini pectus sic affecit, ut
 omnes vias subleuandi afflictis-
 simos in Perside Christianos per se-
 queretur. Cum autem remedium
 aliud nullū inueniret, per legatum
 Persicum, qui tunc aderat, literas
 ad Saporem dedit, quibus seueris-
 simè eum hortatus est, ut Chri-
 stum profitentibus parceret. Ra-
 tiones addidit grauißimas, quibus
 flecti etiam durus & ferreus ani-
 mus

mus poterat. Primum, inquit, ceremonie Christianae religionis eiusmodi planè sunt, ut reprehendi non possint. Non enim victimas mactant, ut Ethnici, sed incruentis gaudent sacrificijs. Deinde preces Deo adhibent, non ullo merito aut dignitate propria nitentes, sed fide pietateq; vera ardentes. Tum Deum propitiū habere omnes asseueravit, qui Christianos foueant ac tueantur. Idq; exemplis comprobauit in utramq; partem, tam eorum, qui Christianā religionem prouexerint, quàm aliorum, qui eandem delere conati sint. Valerianus enim ob Christianorum odium & insecutionē de summo fastigio

deturbatus, omnibusq; Imperij ornamentis ac præsidij spoliatus, à Persis, modis indignissimis tractatus est, pœnaq; sue acerbitalis & odij in Christianos justas grauesq; DEO soluit. Mibi verò, inquit, DEVS ob eiusdem fidei & religionis cultum atq; propagationem victoriam, pacem, & bona cetera cumulatè tribuit. Christianos igitur, quando ea es amplitudine, tibi commendo: hos ipsos, quoniam pietate quoq; præclarus es, tibi trado: hos congruente tibi humanitate & beneuolentia complectere, à te ipso simul & à nobis per fidem immensam initurus gratiam. Nicephorus lib. 8. cap. 28.

EST

Est autem persecutio certissimum argumentum Christiana fidei, & Ecclesia nota minimè fallax. Manifestum est igitur, ea tempestate Ecclesiam in Perside, fuso tam copiosè Christianorum sanguine, indies creuisse, & numerum Christianorum auctum esse. Id quod Augustinus quoq; confirmat Serm. 13. in octauum caput ad Roman. & Epistola ad Vincetium de heresi Rogatiana, ubi ait, etiam apud Persas & Indos Evangelium non minùs, quàm antè, prædicatur.

Etsi autem negari non potest, consequentibus annis in Persia aequè atq; in alijs mundi partibus
C iij diminui-

diminutionem Ecclesiæ magnam
 esse factam, & in dies penè singu-
 los, obscurata Euangelij luce, tene-
 bras fuisse inuectas: tamen mo-
 ueor autoritate, & testimonio Eua-
 grij atq; Procopij, ut post quingen-
 tesimū etiam à nato Christo annum
 Ecclesiam in Armenia, & Persia
 fuisse statuam. Ille enim in Arme-
 niā pernobiles fuisse isto seculo Ec-
 clesias lib. 5. cap. 7. tradit: hic ve-
 rò lib. 2. belli Persici catholicum
 Episcopum Christianum in Per-
 sia nominat. Cui consentit Aga-
 thias lib. 3. ubi Stephano proto-
 martyri templum magnificum in
 Persia extructū, & non procul ab
 urbe Phaside Christianū templum
 fuisse affirmat. Nec sequentibus se-
 culis

culis planè deleri verbum DEI in Persia potuit. Nam de Chosroë Persarū rege scribit Paul. Diaconus lib. 18. rerū Romanarū, cum Ecclesias omnes Christianorum in Perside spoliasse, & Nestorianam heresin eis obtrusisse, non aliam ullam ob causam, nisi ob odiū, quod in Heraclium Imperatorem habebat. Bonfinius verò decadis 1. lib. 8. narrat, Heraclium in singulari certamine interfecisse Chosroëm, partaq; victoria, omnes Persas ultro ei paruisse, & orthodoxam fidem amplexos esse, hoc est, abiecta heresi Nestoriana ad orthodoxam fidem & confessionem reuersos esse. Nec dubium est, Heraclij &

C iiij Chri-

*Christianorum in Perside votis
 Et precibus assiduis tunc de Chös-
 roë impetratam esse victoriam.
 Bis enim miserat ad eum legatos
 Heraclius, per quos pacem etiam
 ignominiosam, vel certè inducias
 saltem sub annui vectigalis condi-
 tione postularat. Sed superbè tan-
 dem eis responderat Chosroës, se ab
 armis desistere non velle, prius-
 quàm effecisset, ut abolito cruci-
 fixi DEI cultu, DEVS Persicus
 adoraretur.*

*Quod verò Platina Et nonnulli
 alij scribunt, Casaream Persa-
 rum reginam circiter annū Christi
 683. in scio marito, nec multò post
 ipsum etiam regem cum quadra-
 ginta*

ginta millibus hominum venisse Constantinopolim, ibiq; baptis-
mū suscepisse, non abs re suspicionem
fictæ narrationis dare videtur:
presertim cū regis nomen nul-
lum exprimatur: quod tamen ut
fiat, historica fides postulat.

Extat porro mentio Ecclesiæ
Persicæ consequentibus etiam eta-
tibus, usq; ad Mahometi domina-
tum, qui non solum regnum Persi-
cum totum complexus est, sed reli-
gionis etiam mutationem horribi-
lem induxit, pro Christi inuoca-
tione cultum Mahometi impor-
tans. Incidit hæc mutatio impe-
rij & religionis in annum Christi
640, quo scilicet à Saracenis victi

*in acie Persæ, occisoq; eorum rege
 Hormisda, unà cum imperio et-
 iam nomen amiserunt, & pro
 Persis Saraceni ceperunt appel-
 lari. Ab eo igitur tempore et-
 iam lex Mahometica in Persia
 viguit, & quanquam indiscreta
 appellatio Turcorum & Sarace-
 norum aliquandiu fuit: tantum
 tamen Turcorum nomen propter
 rerum gestarum magnitudinem
 tandem valuit, ut Saracenorum
 nomen obscurârit & aboluerit.
 Nec tamen una consentiensq; fides
 eorum fuit, qui Mahometi legem
 secuti sunt, indeq; etiam hodie fit,
 ut à Turcis Persæ in religione mi-
 re dissentiant. Idq; inde accidit,
 quod*

quòd Hales gener Mahometi post mortem eius Alcoranum in multis locis immutavit, quadam sustulit, alia adiecit, nonnulla novis interpretationibus correxit, & nova planè effecit. Hinc adeò evenit, ut in sectas complures lex Mahometica discerpta sit, quarum septuaginta dua precipue numerantur. Id quod in Alcorano expresse poni Maierius affirmat. Quod sic tamen accipi debet, plures quidem numerari sectas, sed ex his tamen omnibus unam tantū esse, quæ ad Paradisum ducat, reliquas verò omnes ad ignem æternum inferni. Jam verò illam sectam solis sibi vendicant Persæ, Hales

*Halis ductum sequentes, reliquas
 tanquam impias, impuras & pra-
 uas ad Arabes & Turcos reijci-
 unt. Halem intervallo aliquo se-
 quutus est Hemar; Homarem
 Sophus: Sophum Guines, qui o-
 mnes Mahometanam legem sic in-
 terpretati sunt, ut nemo per eam
 salutem & vitam eternam conse-
 qui possit, nisi ritus, quos ipsi tra-
 diderint, teneat. Est praterea alius
 quidā Doctor Persicæ religionis,
 quam hodie sectantur, Scheiches
 Haidar, quem ob id Turci quoq;
 extremè oderunt: in tanta tamen
 acerbitate odij nihilominus inuen-
 ti sunt nuper admodum penè in-
 numerabiles passim per Anato-
 liam*

IN REGNO PERSICÔ:

liam, qui abiecta religione Turcica, Persicam amare ceperunt. Nec in ipsa Imperij sede Constantinopoli defuerunt, qui cum Persis sentire in religione, quàm cum Turcis mallent. Ac ut evidens nota esset, discernens Persas ab alijs Mahometanis, pileos siue tiaras sic mutarunt, ut pro spiris linteis, quibus Mahometani caput tegunt, Persæ pileos è lana colore rubro tincta compositos, & gradibus senis utrinq; distinctos, ut protendi & contrahi possint, gestarent, ex quo etiam Turci rubri solent appellari. Quin ritus etiam diversos à Turcis tenent, & contra quàm illi, qui quinquies interdum & no-

DE STATV ECCLIE:

Et noctu precantur, semel duntaxat preces Deo adhibent. Hinc igitur reliquum est dissidium acerbissimū Et perpetuum inter Turcos Et Persas, ut omnem sui regni conatum in perniciem Turcorum Persæ parent atq; conuertant, contraq; Turci Persarum nomen Et regnum euersum atq; extinctum velint, cuius quidem conatus ipsorum perditus testis est locuples vox Muphtis, hoc est, Patriarchæ seu pontificis summi Turcorum, quæ percrebuit: Gratius esse acceptiusq; DEO, Persam unum Mahometana religionis causa occidi, quàm Christianos septuaginta interfici.

Circa

Circa Christiana salutis an-
num millesimum, ducentessimum,
quingagesimum octauum, quo
Tartari Persis imperare ceperunt,
quidam Haolonus, expulsis Sara-
cenis, Persas ad fidem Christia-
nam reduxit. Hic captum Ma-
hometica sectæ Doctorem Babylo-
mæ in quodam cubiculo inclusit,
et amoto omni cibo potuq; solo
auro et preciosis margaritis pa-
sci iussit, non ullas epulas conueni-
re, inquiens, huic, qui tantoperè
aurum adamasset. Hoc igitur su-
blato, templa Saracenorum fun-
ditus evertit, contrà verò Christia-
norū, quæ diruta jacebant, instau-
rauit, ipsosq; Christianos euexit et
hono-

honoribus auxit, idq̃, suasu Hay-
thont Armenia regis factum esse
Haythonus in historia Orientali
scribit. Ut enim ab Armenijs
semper religio Christiana culta est
& propagata: sic in vicinam Per-
siam etiam & finitimas regiones
ab ijsdem infusa fuit. Est autem
duplex Armenia, minor & ma-
ior, quarum illa Turcico Impera-
tori, hac verò partim Turcis, par-
tim Persis subiecta est, & Turco-
mania hodie appellatur. Prædi-
catur in primis Armeniorum hu-
manitas erga hospites Christianos,
utpote quos quacunq̃, de causa ad
se venientes ab iniuria prohibent,
& quæ habent, largè eis impertiunt.

Patriar-

Patriarcham habent Christianum, quem Catholicum nominant, ac ritus usurpant multos maxima ex parte cum institutione Christi & nostra Ecclesia congruentes. Sacramentum integrè distribuunt utentibus, & tametsi Missas canunt, nunquam tamen sine Eucharistia id faciunt. Sacerdotibus coniugium Græcorum more permittunt, invocationem intercessionemq; sanctorum cum pontificia Ecclesia admittunt, tum pro alijs etiam Sacramentum offerunt. Extat horum confessio de trinitate & filio Dei Iesu Christo, ex Athanasij scriptis excerpta, quæ cum nostra Ecclesia doctrina

D omni

omni ex parte consentit. Jeiunium
magis a seueritate obseruāt, & eius
tempore ne ouo quidem vescuntur.

Hos à meridie ambiunt Iaco-
bita Christiani, à Iacobo Syro no-
men adepti, à quo etiam Mono-
theletarum heresi fuerunt infecti.
Infantes circumcidunt, baptisant,
& insuper crucis signo in fronti-
bus aut genis ferro candenti im-
presso insigniunt, moti scripturae
verbis, quæ docent, Christum Spi-
ritu sancto et igni baptisaturū esse.
Proinde quasi res distincta sint spi-
ritus sanctus, & ignis, & non una
potius, nempe Spiritus sanctus, qui
est flamma ex Patris & Filij
pectore transmissa. Episcopatus
habent

habent octodecim, sed Patriarchā
 Græcum agnoscunt, à quo tamen in
 multis partibus dissentiunt, maxi-
 me tamē in ritibus, in quibus sum-
 religionis precipuā collocant. No-
 bilitata quoq; est religio Georgia-
 norum intra Euxinū pontum, &
 Armeniam. à Georgio duce suo
 nominatorū, qui Christum & ipsi
 profitentur. Homines sunt simpli-
 ces, & humanitatē prae se ferunt:
 robusti interim & bellicosi. Patri-
 archam habent peculiare, & Epi-
 scopos complures. Elsi autem de
 religione aliqua est inter eos dissen-
 sio: in plerisq; tamen Gregorij Na-
 zianzeni, & Chrysostomi doctrinā
 sequuntur. Deplorandū est autem,
 D ij has

Has ipsas Orientis Ecclesias in tot
 sectas esse distractas, ut alie Euty-
 chetes, alie Nestorij dogmate im-
 plerata teneantur, ac duas distinctas
 in Christo personas credant, qua-
 rum una in terris, altera in cœlis
 fuerit. Latiùs grassata est hac Ne-
 storij hæresis, ac Syria etiam, Chal-
 dea, Mesopotamia, Persidiq; Ec-
 clesias complexa. Etsi autem religio-
 nis usum etiam sub Mahometico
 iugo minimè impeditum tenent: spe-
 ramen libertatis recuperanda le-
 gationem miserunt ad Carolum V.
 Anno 51, extantq; eorum scripta
 nonnulla ad Carolum Burgundia
 ducem, & ad pontificem Rom. ex
 quibus cognosci potest, quàm aui-
 de libera-

de liberationem à Turcica servitute expetant. Sed ad Persicam historiam redeo.

Cum annos iam supra centum viginti octo Tartari in Asia & Persia imperassent, una cum fortuna etiā religionis inclinatio ingens facta est, ut penè de cordibus delapsa Christiana professio prorsus ceciderit. Inventus enim fuit Parthorū Sultanus Gemsa, Mahometica superstitionis culior acerrimus, qui victus & profligatus undiq; Tartaris, ingum acervicibus Persarum depulit. Quod factum est circa annum à nato Christo supra mille trecentos quinquagesimum. Hic tenebras magnas

D iij induxit,

induxit, & pro Christo Salvatore
Mahometum impostorem obtru-
sit.

In quo statu mansit Religio
etiam cum Vjuncassanes ex Af-
simbeia Turcica stirpe imperium
Persicum inuasit. Nec hodie
alia est Ecclesia facies: nisi quod
credo apud Persas aequè atq; inter
medios Turcos per vniuersum
Mahometicum regnum tanquam
in Medea sinu, Christianos passim
diuinitus foueri atque seruari.
Anno autem Christi 1502. Ismaet
cognomento Sophus, item Syach
Ismaet, id est, Propheta Ismael,
vnus de Habi profapia, opinione
sapientia

sapientia & sanctitatis Persiam
 oppleuit. Is cum in sui admira-
 tionem plurimos traduxisset, ar-
 mis etiam sectam, quam proste-
 batur, tueri conatus est. Itaq;
 coactis centies, quinquagies mille
 viris armatis, Turcos Persia ex-
 pulit, & Bajazeto terrorem in-
 gentem iniecit. Hic est Sophus
 ille, qui à DEO missus credeba-
 tur, ut unam illam sectam Ma-
 hometi, quæ ad Paradisum ducti,
 tueretur, reliquas vero septuagin-
 ta unam euerteret & deleret.
 Quocirca omnes nervos regni sui
 contendit, ut hoc quod in votis
 unice habebat, exequeretur.

Hac ipsa etiam causa est, cur exercitus paratos & faciles habuerit. Proprijs enim sumtibus militabant, perinde atq; in Christianorum Ecclesia factum est, cum crux aduersus infideles distributa fuit. Propter hanc voluntatum inclinationem, qua ad illum incubuit, opes Persica mirum in modum creuerunt, accurrentibus ex cunctis Asia locis ijs, qui sectam illam speciosam venerantur. Quò magis etiam hodie formidini terroriq; Turcis esse fortunam Persarum comperitur. Scribit Maierius, in aula huius Ismaelis parcum saginatum esse, qui Turcici Imperatoris nomine

Paşa-

*PaZabyth appellatus sit, quo odiū
immane in Turcos declararetur.*

*Mira alia narrat de eodem, quod
tanquam Propheta à suis adora-
tus sit, nec se conspiciendum cui-
quam præbuerit, nisi velata fa-
cie, ut Moysi similis videretur.*

*Dicitur crebris sermonibus usur-
passe has minas: Non cessaturam
esse acinacis sui aciem, priusquam
omnes versus meridiē adorantes,
hoc est, Turcos, è medio sustulisset.*

*Idcirco etiam templa eorum demo-
litus est, & quoscunq; viuos ce-
pit, mala morte affecit. Nec Iu-
deis etiam pepercit, sed quotquot
ferè comprehendit, oculis effossis,
dimisit. Contrà verò in Christia-*

D V nos

nos beneuolentiam suam natiuit,
 & ab eorum templis vim absti-
 nuit. Armenia Patriarcham,
 plurim^{os}q^{ue} religionis & fidei Chri-
 stiana sacerdotes fouit. Eò de-
 niq^{ue} omnes suas curas & cogita-
 tiones conuertit, ut legem Maho-
 metanam, quam acerrimè odit,
 destrueret, & sanctam fidem Ca-
 tholicam augetet. Aiunt etiam,
 Christianos passim frequentes per
 Persiam dispersos esse, qui religio-
 nem Æthiopici regis Ioannis pre-
 ciosi profiteantur. Idq^{ue} inde fa-
 ctum esse scribitur, quòd Persa
 non ita multò ante hac tempora,
 circa annum uidelicet sexagesi-
 mum

IN REGNO PERSICO.

num supra millesimum & quin-
 gentesimum à nato Messia ab
 Aethiopum rege Christiano auxi-
 lia aduersus Turcos petiuit. Hic
 verò opem & subsidium suum
 illi quidem haud denegauit, sed
 foedus tamen & coniunctionem
 nullam satis firmam esse posse in-
 ter se & illum existimauit, nisi
 in religione etiam utriq; consen-
 tirent. Si igitur societatem belli
 atq; periculi facere cum Aethio-
 pibus Persæ cuperent, necesse es-
 se, ut una etiam mente, unaq;
 fide vnum DEVM & vnum
 CHRISTVM veri DEI filium
 confiterentur. Placuit con-
 ditio

ditio Persis, moxq; missi sunt in Persiam cum Patriarcha Sacerdotes ex Æthiopia, qui Christianam fidem predicarunt, libros sacros importarunt, & ceremonias Æthiopica Ecclesia usitatas induxerunt. Tum quia utraq; gens Æthiopica & Persica Turcos odit, cepit eorum odio etiam circumcisio Æthiopibus & Persis odiosa esse, ne videlicet commune aliquid cum Turcis in religione viderentur habere. Sacramenta verò integra habent Persæ, & cœnam Domini sic celebrant, ut antequam eam adeant, pedes lavari sibi sinant. Quod hoc modo fieri solet; Assident ad rivulum, qui

IN REGNO PERSICO.

qui templum perlabitur, ij, qui
cœna sancta v'suri sunt, ad eos ac-
cedit primarius quispiam ciuita-
tis, & pedes singulorum lavat.
Hoc factò osculantur sese mutuo,
& cœnam sanctam absq; confes-
sione, aut ceremonia alia sumunt. In
templis suis imagines nullas fe-
runt, neq; etiam Missas legunt,
aut Psalmos canunt, sed horum
loco citharas, tibias & alia musi-
ca instrumenta adhibent. Hinc
mirificè aucta & amplificata est
Ecclesia Christi in regno Persico.
Ut autem nota esset, quæ Persas
reliquos à Christianis hisce di-
scerneret, sinistro pedi crucem
cœruleam Christiani imprimere
ceperunt.

Ex

DE STATV ECCLE:

Ex quo sanè intelligi facile potest, ne nunc quidem fidem Christianam in Perside extinctam placere esse, sed reliquias Ecclesie Catholicae per amplissimas illas regiones passim dispersas adhuc conservari. Credo enim, eandem pietatem in Christianos etiam nunc in Mahomete Codabende, qui Persica lingua serius DEI est, reperiri: quippe qui sectator huius divini Ismaelis haberi vult, nec minus, quam ille, haeticum Turcam odit, & delere conatur. Nec quicquam etiam quod ad efficiendi facultatem pertinet, praetermittit. Aequè enim missis ad regem Hispaniarum Christianum

IN REGNO PERSICO.

num literis, opem eius aduersus
Turcos implorat, hortaturq, ut,
quamuis in religione differant,
nihilominus tamen totis viribus
in Europa illos aggrediatur, sese
in Asia cum oppugnaturū esse sa-
tis pollicens. Cepit is regnare
anno Christi 1577, & cum Tur-
cis acerrima bella gerit. Fia ergo
Christiana religio non per Turci-
cum tantum regnum, sed etiam
per Persicum disseminata mira-
biliter inter hostes conseruatur,
nec ferè angulus est mundi, quo
non fama Christi penetrarit.

Pro tanta verbi diuini co-
pia & propagatione est quod
gratias

gratias DEO agamus, & deinceps
 etiam custodiri Ecclesiā petamus,
 donec cœlesti hospitio accipiat,
 & ab exilio, ærumnis, squalore,
 & angustia liberata in aeterna
 beatorum sede collocetur. Quod
 autem de Persia & eius religione
 hactenus demonstratum est, idem
 de Assyria, Media, & vicinis
 coniunctisq; regnis, quæ Persico
 imperio comprehenduntur, intel-
 ligi debet. Consentaneum enim
 est, has regiones cum eodem im-
 perio si non omnino, tamen ex par-
 te quadam contineantur, eandem
 etiam religionem, vel certè non
 multum disparem usurpare. Nisi
 quod in alijs paribus plus, in
 alijs

alijs minus errorum fortè reperi-
tur. Certè eorum qui Chaldaam
incolunt, alij Nestoriani sunt, ut
scribit Haythonus, hoc est, Nef-
rij errore impliciti. Hiq; literis
Chaldeis utuntur. Alij sectam
profitentur Mahometicam, & li-
teras Arabicas habent. Quis au-
tem est, qui pro rei atrocitate de-
plorare satis tantam calamitatem
Ecclesie Orientalis queat? quae
obscurata luce doctrinae caelestis
in tantis errorum nebulis versa-
tur. Etenim maxima eius pars
Mahometi blasphemias sequitur,
& loco Filij DEI Salvatoris nostri
unici, hominem ex fraude & sce-
lere conflatum colit. Et quod

E

lamen-

tamentandum est magis, etiam illi
 ipsi, qui Christum profitentur, in
 horridos errores inducti, Nesto-
 rianismum & alios errores reti-
 nent. In hanc igitur faciem Orien-
 talis Ecclesie iam squalidam &
 miseram intuentes cohorrescamus
 totis animis, & iram DEI iustam
 aduersus impietatem & ingrati-
 tudinem nostram deprecantes, lu-
 cem verbi ardentius amemus, di-
 uinitusq; regi nos petamus, ne vel
 propter ignauiam gratia DEI ex-
 cidamus, vel propter cupiditatem
 errorum tenebras, quales Orien-
 tali Ecclesie offusae sunt, temere no-
 bis accersamus. Illud tamen in-
 terim teneamus, etiam in magna
 caligine

caligine Orientalis Ecclesiae, reli-
quos esse aliquos Christianis, qui
Filium D E I profitentur & inuo-
cant, quamvis pauci numeren-
tur, ut semper Ecclesia exigua
est in mundo cœtus, ex magna col-
luvie gentis humane excerptus :
ne desint, qui D E V M verè cogno-
cant & colant. Id enim ex prædi-
catione Christi certum est, prædica-
tum iri Euangelium in uniuerso
terrarum orbe usq; ad extremum
diem, quo Ecclesia in æterna taber-
nacula recipietur. Nobis profe-
ctò, Orientalis Ecclesiae historia
eum fructum affert, ut ex collatio-
ne caliginis illius, & lucis, qua nos
fruimur, magnitudinem benefi-

ciorum DEI in nos perspiciamus
 magis & quotidie vota faciamus,
 ne propter ingratitudinem in eas-
 dem tenebras delabamur. Vi-
 enim in Oriente cepit Ecclesia ve-
 ra, sic ex ea paulatim progressa
 ad Occasum, hac etiam loca arctoa
 complexa est. & hospitium nobi-
 scum fecit, nec procul à fine pere-
 grinatio, militiaq; eius abest: sed
 defessa iam labore & itinere, cur-
 sum abruptura esse videtur.

Hic est Ecclesia status, qui
 fuit & est hodie in Persia, ex au-
 toribus probatis expositus, &
 temporibus distinctus, unde qua-
 lis ferè in singulis mundi atibus
 fuerit, cognosci potest.

Profectò

Profectò si quod aliud regnum, certè Persicum, insignes mutationes expertum est, dum inde usq; à Monarchia per Alexandrum Macedonem destructa, cum Graecis, Romanis, Saracenis, Tartaris, de summa rerum decertavit, & hoc ipso tempore cum Turcis de omnibus fortunis Reipub: praelijs frequentibus dimicat. Etsi autem minores sunt opes regis Persici, quàm Sultani Turcici, propterea quòd minus ille exactionibus subditos suos vexet atq; expilet, quàm Turca: tamen plus animi & nervorum in Persis est, quàm in Turcis. Quorum quidem dimicatio & victoria cum Turcicum

E iij furorem

DE STATV EC'CLE:

*furorem à nostris ceruicibus re-
pellat, causam equidem optandi,
dari nobis existimemus, ut bene
feliciterq; conatus eorum in
debellando Turca
eueniant.*



FINIS.



DE CL. V.

Matthæo Dressero,

ORATORE, PHI-
LOSOPHO, ET MEDICO
VTRIVSQ; LINGVÆ ET HI-
storiarum in Acad. Lip,
Professore.

πολλὰ καλοῖς καλᾶτοῖς ἢ ἅπασι σαφῶς ὁ
ΔΡΕΣΗΡΟΣ.

ποιεῖ ἢ ἐγράφει: ὅτι καλὸς πέλειται
τοῦνεκα ἢ κείνα ἢ τοις κεχαρισμένοις ἔσαι
τῷ θεῷ: ἢ καλοῖς φήμῃ ἢ εὐσεβείᾳ.

Multa bonis bona, perspicuè cunctisq;
DRESERVS,
Cum sit & ipse bonus: scribit agitq;
benè.

Ipsius est igitur pia mens, & fama futura,
Multis nota, Deo grata, dicata bonis,

*M. Mel. Gerlachius Sor. Lusat.
Viteberga 18. Feb.
an. Sal. 1589.*

Staatl. Bibliothek
Regensburg

DE CL. V.

ORATOR

PROLOGUE

ACT I

ACT II

ACT III

ACT IV

ACT V

ACT VI

ACT VII

ACT VIII

ACT IX

ACT X

ACT XI

ACT XII

ACT XIII

ACT XIV

ACT XV

ACT XVI

ACT XVII

ACT XVIII

REPRODUCED BY THE
UNIVERSITY OF CHICAGO

